

Erdić, Trako i Keserović negirali krivicu

Husein Erdić (34), Midhat Trako (67) i Merim Keserović (18) jučer su se pred sutkinjom Željkom Marenić izjasnili da nisu krivi za krivično djelo protuzakonito formiranje i pridruživanje stranim paravojnim ili parapolijskim formacijama. Nevada Hušidić (26), koji se prema optužnici državnog Tužilaštva tereti za ista krivična djela, nije se pojavio u sudnici jer, kako je istakao njegov advokat Senad Dupovac, nije imao novca za dolazak.



Sutkinja Marenić je konstatovala da je optuženi po primitku poziva trebao obavijestiti Sud o tome, te dostaviti dokaze kojim bi potkrijepio svoje navode. Dupovac je na to odgovorio da je njegov klijent pravno neuk, nakon čega je sutkinja kazala da će narednog ponedjeljka biti održano ročište na kojem će se Hušidić izjasniti o navodima optužnice. Predmet protiv optužene trojke koja se jučer izjasnila o krivici će biti proslijeđen Vijeću koje će u narednom periodu, najduže do 60 dana, zakazati početak suđenja. Ukoliko se Hušidić izjasni isto, ovaj će postupak biti primijenjen i u njegovom slučaju. On i Keserović brane se sa slobode, za razliku od Erdića i Trake, koji se nalaze u pritvoru i koji su jučer dovedeni sa liscama na rukama i u pratnji sudskih policajaca. Erdić je, prethodno odgovarajući na pitanja Marenić, kazao da je neosuđivan i nezaposlen. Trako je kazao da je penzioner, uslovno osuđivan, dok je Keserović naveo da je učenik trećeg razreda.

Kako se navodi u optužnom aktu, Erdić je s ciljem pridruživanja stranoj paravojnoj formaciji koja djeluje van BiH početkom februara 2015. organizirao i rukovodio, a potom i dogovorio sa njemu poznatim osobama iz Turske da sa područja BiH na ratište u Siriju i Irak organizira odlazak dva bh. državljanina, Nevada Hušidića i Merima Keserovića, s ciljem njihovog protivzakonitog pridruživanja terorističkoj organizaciji ISIL. Trako se tereti da je po prethodnom dogovoru sa Erdićem, dao Keseroviću i Hušidiću novac za kupovinu avionskih karata za relaciju Sarajevo - Istanbul. Erdić i Trako su uhapšeni u akciji Damask, a hapšenje Keserovića i Hušidića uslijedilo je nešto kasnije i to na Aerodromu u Sarajevu, gdje su planirali da preko Istanbula odu u Siriju i tamo se navodno priključe terorističkoj organizaciji Islamska država čije su simbole i obilježja imali na profilima na društvenim mrežama. **A. B. Č.**